

IL STROLEGAÇ

Tal screâ une gnove pagjine dal grant libri de vite, al è plui che naturâl sperâ ch'e sedi une pagjine pusitive e che, dopo tantis di scartis, si sedi capitâts propit te stele o tal planet induvinât. Chest al fâs part di chê sperance-debolece dal om di inludisi che il so distin al sedi segnât dut lassù e che, timp o tart, e rivi la volte juste.

Al sucêt soreduç cuant che si scree une gnove desene (tal nestri câs, i "agns Otante") o che si sdongjisi al Mîl.

A volê fâ i strolics, ancje cuntun fregul di crepe, si podarès antivedê che l'an o i agns che o vin scomençât a roseâ, a saran grivis. Cualchidun adiriture al tire fûr la solfe che, midiant che l'om nol pò stratignîsi a lunc dal sbarâ e copâ senò lu cjape il convulç e le bat, o saressin propit rivâts al moment che al à di sclopâ alc. Ce? E se ancje al ves di sucedi, par nô furlans saressie la prime volte? E cui à dit mo che la storie e vedi di cjaminâ simpri par chel troi?

Se, metìn, o vessin di restâ a sut di petrolio, sarae plui grivie par nô o pai bassarûi? Dopodut, par chês grandis fabriconis che nus àn fat cassú ... E se nus tocjarà lâ un tic di plui a piduline, isal propit tant mâl par un popul che al à fate la cjarcute batint dutis lis stradis dal mont? Se al capite un sinistri, al diseve biât Fedro, al mus no i metaran migo sù doi bascj? Al è un vissi aromai chel di cjalâ tant lontan o adalt. Salacor par fâ fente di no viodi la cragne ch'e je sot dal nâs. E cussì si ripiisi a ogni sorte di scusis e di sflocjis par no cjapâsi la responsabilitâ des sôs azions. E alore si butisi a mul o te disperazion plui penge o te inlusion plui svariade.

In cjampl internazionâl, atac dal fenomeno dal "riflûs", o vin chelâtri, de religjon ch'e torne a dâ di ca. I arabos a àn ciatâts i lôr ajatolâs che a batin fûc e flamis in non di Maomet e i catolics a àn il lôr capo, che al ties e che al baline intune atôr pal globo in non de Madone e dai dirits dal om. I vantaz (e i svantaz) di chê int alì, sentade sul scagn plui alt, a son chêi di podê fâ stât suntune mânies di simiots ch'a sbelein dut ce che al fâs e che al dîs il prin. E cussì ducj i ajatolâs mussulmans a van daûr di Komeini e ducj (o scuasint) i nestris sorestantis glesiastics a van daur di Woytjle. O che la lûs e je tant grande ch'e incee (e in chest câs, benvignûts), o che cheâtris a son une maneçade di paveis, intentis dome a cirî un lusôr cualunche.

Tun câs e ta chelâtri, si trate simpri di pocje cunsiderazion e stime di sè, stant che il prin ajatolà e il prin pape e je e e reste la cussience.

In merit dal "riflùs", vadì che la int ingomeade dal pulitic e torne a parâsi jù la sô cragne par cont so, e je ancje une robe meretorie. Al coventave un freno a di cheste mame dal sociâl, che dibot ancje il jet e il cesso a jerin in place.

Ognun ch'al fasi ce che al pò, miei che al pò, prin par sè e, s'j vanze, ancje par cheâltrys. Cence nissune sen e cence nissune debolece o flaperie. E no stin a cjalâ masse in là. E je une mode taliane chê di pensâ al dopo-Cossiga dome parcèche no si sa ce fâ e ce dî e cemût frontâ il Cossiga.

Il mont vadial malamentri? E sarà ben, bambùc, une stale o un cjôt par tignî une vacje e un purcit, se no si è smamide dal dut la voe di lavorâ. L'Italie vadie denant-daûr? E cui à dit che la muart dal lôf no puedi jessi la furtune de piore?

Pa la cuâl, tachìn cun fede e cun snait l'an gnûf. Al sarà un an impuantant par nô furlans: pe ricostruzion dai païs ancjemó slambrâts, pai miliarts che a plombaràn chenti almancul tes promessis che ancjemó une volte a vignaran a fânus sot votazions. Chê int lì, quant che no rive a mertâsi i vôts, sai compre, cui bêçs dai stupits.

Sù in Cjargne, sot de Tersadie, e je une crete ch'j disin "il Cret dal An dai Solz". Stant ai viei, alì sot al vares di jessi sapulît un tesaur. A san ducj che al è ma fint ore nissun no lu à ciatât. Intant però a continuin a sperâ.

A ogni votazion al ven di pensâ a di chest tesaur che nol salte mai fûr e a di cheste crete che ducj i pulitics a zurin di menâalus a sgjavâ par ciatâ la furtune. Daspò si à simpri scugnût tornâ indaûr scuintiâts, ma intant però ducj a son lâts daûrjur tant che sturnei. E lôr lu san benin e benon.

Chel tesaur platât nissune DC e nissun PCI no nus al daran par mai. E varà di jessi une concuiste nestre, dì par dì, a sun di doprâ braçs e cjâf. E no dome pai agn 80 ma fintremai che in chest mont e continuârà la liende dal popul furlan.